

五十三之書叢小醫國



國

秦

伯

未

著

醫

小

史

上海國醫書局印行



國醫小史導言

往昔無國醫專史。史所以記歷代政治文化學術之變遷。用資攷證。醫亦學術之一。烏可以無。余掌教于中醫專校有年。士子恆以不知醫學源流相詢問。夫爲醫而不知源流。將何以溯本而尋支。矧復歷代標新。學說互異。溫涼偏尙。攻補相詆。昏夜無燭。能不陷于荆棘叢者幾希。爰追平日問答。次第先後。葺國醫小史一書。曰小史者。媿未詳盡也。脫稿卽付手民。以應急需。乙丑七月。上海秦伯未記。

國醫小史例言

本書採用問答體。詞句務求簡明。

先論一代之大概。次述著名醫家。末示學醫之方針及其他。著名醫家。以有關於一代變遷者爲限。

古今書籍曠繁。茲舉其重要者。附於醫家之後。

本書所論。自上古至清代爲止。民國以後。暫不列入。

本書專論國醫源流。西醫學派。概不錄取。匪存排斥。恐越範圍。

國醫小史

上海秦之濟伯未述

問。我國醫學之鼻祖何人。

答。炎帝神農氏。當時不知耕種畜牧之法。以自然產生之植物爲生
活資料。草木中含有吐瀉之性質者。亦徑取食之。神農辨別某也
催吐。某也促瀉。某草某木不可作食料。並用催吐之草木。以治心
胸苦悶之患。促瀉之草木。以治腹脹便閉之患。實爲醫學智識所
濫觴。宋劉恕通鑑外紀曰。炎帝始味草木之滋味。神而化之。遂作
方書。以療民疾。而醫道立。可證也。

問。神農以後。醫家輩出。代有發明。約可分爲若干時期。

答。可分九時期。一上古之醫學。二周秦之醫學。三兩漢之醫學。四兩晉至隋之醫學。五唐之醫學。六宋之醫學。七金元之醫學。八明之醫學。九清之醫學。

問。上古之醫學何如。

答。上古之醫學。爲醞釀時期。承神農之後。藥物未備。病症未詳。然後世學說。泰半導源于此時。而加以推闡者也。

問。上古之著名醫學家。可稽考否。

答。有僦貸季、岐伯、雷公等數家。

問。僦貸季何如人。

答。神農嘗命理色脈。對察和齊。摩踵誦告。以利天下。而人得繕其生。乃發明家之一也。

問。岐伯何如。

答。岐伯爲僦貸季弟子。內考五藏六府。外綜經絡血氣色候。參之天地。驗之人物。本之性命。窮神極變。而鍼道生焉。

問。雷公何如。

答。雷公黃帝臣。與岐伯察明堂。究息脈。處方餌。察五氣。立五運。洞性命。紀陰陽。著素問靈樞。總爲內經十八卷。爲醫之祖書。

問。周秦之醫學若何。

答。周秦之醫學。爲進步時期。周設醫師。掌醫之政令。聚毒藥以供醫事。秦有太醫令丞侍醫主醫藥。可知當時醫藥之盛行。而周禮天官分爲食醫疾醫瘍醫獸醫之職。又醫學分科之始也。

問。請告周秦之著名醫學家。

答。有醫緩、醫和、盧氏、扁鵲等數家。

問。醫緩若何。

答。醫緩秦人。晉侯有疾。夢二豎子匿膏盲。發使延緩。緩察容候。脈曰。病在膏盲。藥餌不可及。針灸不能至。不可爲也。晉侯聞之。嗟曰。良

醫也。今古罕有。

問。醫和何如。

答。醫和昌明天有陰陽風雨晦明六氣。陰淫寒疾。陽淫熱疾。風淫末疾。雨淫腹疾。晦淫惑疾。明淫心疾之說。治平公疾。謂上醫醫國。其次醫人。趙孟目爲良醫。

問。盧氏何如。

答。盧氏治季梁疾。曰。疾不由天。亦不由人。亦不由鬼。稟生受形。既有制之者矣。亦有知之者矣。藥石其如汝乎。季梁曰。神醫也。俄而其疾自瘳。

問。然則扁鵲何如。敢乞述之。

答。扁鵲勃清羣。鄭人。姓秦氏。名越人。得長桑君禁方。能盡見五藏癥結。會虢太子死。扁鵲詢得實。歎曰。太子病。所謂尸蹶者也。夫以陽入陰中。動胃纏緣。中經維絡。別下於三焦膀胱。是以陽脈下遂。陰脈上爭。會氣閉而不通。陰上而陽內行。下內鼓而不起。上外絕而不爲使。上有絕陽之絡。下有破陰之紐。破形絕陽之色。已發脈亂。故形靜如死狀。太子未死也。乃厲鍼砥石。以取外三陽五會。有間。太子蘇。乃爲五分之熨。以八減之劑和煮之。更熨兩脅下。太子起坐。天下盡以扁鵲爲能生死人。箸有難經二卷。學者宗之。

問。兩漢之醫學奚似。

答。醫學至漢代。可謂極盛時期矣。名醫繼起。醫學之昌明。有一日千里之勢。其進化之盛。固周秦間所未及。抑豈後世所能望其項背也哉。

問。兩漢著名之醫學家何人。

答。前漢有淳于意。後漢有秦信、張機、華陀等輩。

問。淳于意何如人。

答。淳于意臨菑人。受師于公乘陽慶。傳黃帝扁鵲之脈書。五色診病。知人死生。決嫌疑。定可治。及藥論甚精。嘗自錄治驗。上之史氏。以

示治病之要。簡古而理精奧。實爲後世醫案之嚆矢也。

問。秦信何如。

答。秦信少明敏。好經方本草。及黃帝扁鵲之書。史記稱之爲當代良

醫。

問。張機何如。

答。張機字仲景。南羣涇陽人。學醫于張伯祖。盡得其傳。居嘗歎曰。古者上醫相色。色脈與形。不得相失。中醫聽聲。聲合五音。下醫診脈。流傳移動。審知五藏之微。此乃爲妙也。又曰。不須汗而強汗之者。出其津液。枯竭而死。須汗而不與汗之者。使諸毛孔閉塞。悶絕而

死。不須下而強下之者。令人開腸洞泄不禁而死。須下而不與下之者。令人心內懊懣。脹滿煩亂浮腫而死。不須灸而強與灸之者。令人火邪入腹。重加其煩而死。須灸而不與灸之者。令人冷結重凝。無地消散而死。議論極精。箸有傷寒論十卷。金匱要略八卷。集漢前醫學之大成。方書之鼻祖也。

問。華佗何如。

答。華佗一名萐。字元化。沛國譙人。凡疾發于內。鍼藥所不能及者。乃令先以酒服麻沸散。既醉無所覺。因剗破腹背。抽割聚積。若在腸胃。則斷截湔洗。除去疾穢。既而縫合。敷以神膏。四五日創愈。一月

間皆平復。真如庖丁解牛。揮刀無礙。乃我國外科手術之先師也。
傳有中藏經八卷。

問。兩晉至隋之醫學何如。

答。兩晉至隋之醫學亦屬文明時期。蓋兩漢雖盛。而藥物學診斷學等。未能明錄。竹帛。至晉宋齊梁陳魏隋而闡發無遺憾。承先啓後。一大關鍵也。

問。兩晉至隋之著名醫學家。可得若干人。

答。晉有王叔和、皇甫謐、葛洪。齊有褚澄、徐之才。梁有陶弘景。隋有全元起、巢元方等諸家。

問。王叔和高平人。有所發明否。

答。王叔和高平人。窮研方脈。洞識修養之道。撰脈經、脈訣、脈訣圖要、脈賦諸書。後代診斷學之權輿也。

問。皇甫謐何如。

答。皇甫謐字士安。幼名靜。自號元晏先生。安定朝那人。得風疥疾。因而學醫。集覽經方。手不釋卷。遂盡其妙。嘗謂受先人之體。有八尺之軀。而不知醫事。此所謂遊魂耳。箸有甲乙經八卷。

問。葛洪何如。

答。葛洪字稚川。自號抱朴子。丹陽句容人。學於鄭隱。悉得其法。而獨

好神仙導引之術。煉丹以期遐年。著有金匱藥方一百卷。肘後要急方四卷。

問。褚澄何如。

答。褚澄字彥道。陽翟人。建元中豫章王感疾。太祖召澄爲治。立愈。又治李道念痼疾。令取蘇一升煮服。得吐雛雞十三頭而瘥。當時稱妙。著有醫論十篇。卽褚氏遺書也。

問。徐之才何如。

答。徐之才丹陽人。家學淵源。投藥石多效。朝賢競相要引。爲之譽延。分藥爲宣通補瀉滑燥濕輕重十劑。爲調劑分類之始。著有徐

氏八世家傳效驗方十卷。

問。陶弘景何如。

答。陶弘景字通明。號華陽隱居。覽本草藥性。盡得聖人之心。先時神農本草藥分上中下三品。計三百六十五種。弘景復增漢魏以下名醫所用三百六十五種。著名醫別錄三卷。

問。全元起何如。

答。全元起之術。悉祖內經。當時有得之生。捨之死之概。箸有內經訓解。爲註內經之最古者。

問。然則巢元方何如。

答。巢元方博學精該。著有諸病源候論五十卷。今所傳巢氏病源是也。

問。唐之醫學進步歟。退化歟。

答。唐之醫學。可名爲變遷時期。自佛教輸入。而佛之學說。混入醫學。古方用藥。無一味遊移假借之處。至此兼取雜方單方及通治之品。故有一病而立數方。一方而治數病。然用意之奇。用藥之巧。亦有不可磨滅處。特胸無成竹者。觀此衆說紜紛。羣方淆雜難免。茫然失其所據耳。

問。唐之著名醫學家有何人。